

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. इस ब'रे दी श्री अमरनाथ जी दी यात्रा 29 जून थमां शुरू होने दी मेद ऐ, एह यात्रा 52 दिनें तगर जारी रौहग। उपराज्यपाल मनोज सिन्हा हुंदी अगुवाई च लग्गी दी श्री अमरनाथ श्राईन बोर्ड दी बैठक च इंतजामें दा जायजा लैता गेआ।
2. उधमपुर लोकसभा सीट थमां 2 मेदवारें अपना नामांकन भरेआ।
3. सेना दी उत्तरी कमान आस्सेआ उत्तर प्रदेश च आयोजित आलंकरण समारोह दरान सेना दे जुआनें गी सम्मानत कीता गेआ।
4. जम्मू बिजली विकास कारपोरेशन नै फैसला कीता ऐ जे ओह खित्ते च बिजली दी चोरी करने आलें खलाफ एफआईआर दर्ज करोग।

<><><><><><>

Amarnath Yatra

इस ब'रे दी श्री अमरनाथ जी दी यात्रा मेद ऐ जे 29 जून थमां शुरू होग ते रक्खड़-पुन्नेआ आले दिन यानि 19 अगस्त गी सम्पन्न होई जाग। श्री अमरनाथ श्राईन बोर्ड दी इस बारे कल इक बैठक लग्गी जेहदी अध्यक्षता उपराज्यपाल मनोज सिन्हा होरें कीती। बैठक दरान रस्ते, सुरक्षा इंतजामें गी हैलीकाप्टर सेवा, बाहू रिहायश, पंजीकरण ते होर दुए सरबंधी मामले पर चर्चा होई। पिछले ब'रे एह यात्रा 60 दिनें तगर चली ही, इस बारी एह यात्रा 52 दिनें दी होग। अधिकारिक सूत्रें दस्सेआ जे एह फैसला श्रद्धालुएं लेई गै लैता गेआ ऐ तां जे खीरलै दिनें च ओने आले श्रद्धालु बी पवित्र गुफा च बर्फू कन्नै बने दे शिवलिंग दे दर्शन करी सकन।

<><><><><><>

Nominations

उधमपुर लोकसभा हल्के थमां दऊं मेदवारें कल नामांकन पत्र भरेआ। आकाशवाणी जम्मू संवाददाता दी रिपोर्ट मूजब इनें दौनें मेदवारें च डॉ. जितेन्द्र सिंह ते प्रेमनाथ होरें रिटर्निंग अफसर दे दफतरै च अपना नामांकन

दाखल कीता। नामांकन भरने दे खीरी तरीक 27 मार्च 2024 गी बडलै 11 बजे थमां लेइयै दपैहरी 3 बजे तगर दी ऐ।

<><><><><><>

Congress

कांग्रेस पार्टी नै औंदे लोकसभा चुनाएं गी दिक्खदे होई 57 मेदवारें दी अपनी त्री सूचि जारी कीती ऐ। इस दरान उधमपुर ते जम्मू सीट लेई मेदवारें दे नाएं पर बी चर्चा कीती गई। पार्टी सूत्रें दस्सेआ ऐ जे उधमपुर-डोडा लोकसभा सीट लेई चौधरी लाल सिंह हुंदे नां पर बचार बमर्श होआ। जिसलै कि जम्मू रियासी संसदीय हल्के लेई कांग्रेस दे रमण भल्ला हुंदे नां गी तकरीबन मुकदा रूप देई दित्ता गेदा ऐ। साबका उपमुख्य मंत्री तारा चंद हुंदे नां पर बी चर्चा होई। हालांके अजें तगर कोइ बी औपचारिक घोषणा नेइ कीती गई ऐ। चौधरी लाल सिंह होर हाल च नमीं दिल्ली जाइयै कांग्रेस पार्टी च परतियै शामिल होई गे हे। मगरा नमीं दिल्ली थमां जम्मू परतोने पर जम्मू हवाई अड्डे पर पुज्जने मगरा जोरदार सुआगत कीता गेआ। इस मौके पर खरी मती गिनतरी च कांग्रेस कारजकर्ता लाल सिंह हुंदे समर्थक ते आम लोक मजूद हे।

<><><><><><>

NC Candidates

नैशनल कांफ्रेंस दे उप-प्रधान उमर अब्दुल्ला होरें आक्खेआ जे औंदे लोकसभा चुनाएं लेई मेदवारें दी घोषणा ईद-उल-फीतर मगरा कीती जाग। अब्दुल्ला होरें मीडिया गी जानकारी दित्ती जे उंदे हल्के च चुनां त्रीये चौथे ते 5में गेड़ तैह्त होंगन ते मेदवारें दे नाएं दी घोषणा करने लेई अजें बड़ा मता समे ऐ। उमर अब्दुल्ला होरें कथित तौरा पर भारतीय जनता पार्टी पर दोगलेपन दा आरोप लाया ते गलाया जे ओह म्हेशां परोआरवाद दी गल्ल करदे न पर भाजपा नै बी सियासी फायदे लेई गठबंधन कीता ऐ। उंदा एह ब्यान बिहार च चिराग पासवान ते महाराष्ट्र च वरिष्ठ बीजेपी नेताएं ते राज ठाकरे हुंदे मझाटै हाल च होई दी बैठक गी दिक्खदे होई आया ऐ।

<><><><><><>

JKNPP

चुनां आयोग नै जम्मू कश्मीर नैशनल पैर्थस पार्टी गी ओहदा नां ते चुनां नशान साइकल दा इस्तेमाल करने िमां रोक दीत्ता ऐं इस सरबंधै च चुनां आयोग नै इक अंतरिम निर्देश जारी कीता ऐ, इत्थें एह दस्सना लाजमी ऐ जे पार्टी दे नां गी ते चुनां नशान गी इस्तेमाल करने गी लेइयै सुर्गवासी प्रो. भीम सिंह हुंदे रिश्तेदार विलक्षण सिंह ते देव सिंह हुंदे बश्कार विवाद ऐ ते एह मामला अजें बी चुनां आयोग अगगे बकाया ऐ।

<><><><><><>

INFO Ministry

सूचना ते प्रसारण मंत्रालय नै परामर्श जारी करियै सोशल मीडिया पर सब्बने समर्थन करने आले ते इनफ्लून्स यानि प्रभावशाली लोकें कन्नै कुसै बी रूपै च ऑनलाइन सट्टेबाजी ते होर सरबन्धी नेह इश्तेयारें ते प्रचार सामग्री दस्सने थमां परहेज करने लेई आक्खेआ ऐ। मंत्रालय नै उपभोक्ताएं, खास करी युवाएं पर ऑनलाइन सट्टेबाजी ते जुए दे माली ते समाजिक आर्थिक असर गी दिक्खदे होई एह परामर्श जारी कीता ऐ। मंत्रालय नै आगाह कीता ऐ जे इस परामर्श दे अनुपालन च विफलता पर उपभोक्ता संरक्षण अधिनियम 2019 दे प्रावधानें दे तैह्त कारवाई कीती जाई सकदी ऐ।

<><><><><><>

Northern Command

उधमपुर आधारित भारतीय सेना दी उत्तरी कमान नै कल अपने सैनिकें ते यूनितें गी उत्तर प्रदेश दे प्रयागराज च आयोजित इक आलंकरण समारोह दरान सम्मानत कीता। इस कार्यक्रम दा आयोजन रैंड ईगल डिवीजन दे बैनर हेठ होआ। जुआनें गी उंदी बहादुरी ते टकोहदी कारकरदगी लेई सम्मानत कीता गेआ। कार्यक्रम दरान 9 विशिष्ठ सेवा मैडल, 1 योद्ध सेवा मैडल, त्रै सेना मैडल ते 45 सेना मैडलें सनें 58 पुरस्कार प्रदान कीते गें एहूदे अलावा 64 युनितें गी बी सम्मानत कीता गेआ। डिफेंस पीआरओ जम्मू हुंदे मूजब उत्तरी कमान प्रमुख लैफ्टिनेंट जनरल एम.वी.सुचिन्दर कुमार होरें जुआनें ते अफसरें सनें युनितें गी उंदी ड्यूटी दरान असाधारण कारकरदगी लेई सम्मानत कीता ते जेतुएं गी बधाई दित्ती। भारती सेना दी उत्तरी कमान इक प्रमुख कमान ऐ जेहड़ी कारवाइएं दे स्हाबै सब्बने थमां बद्ध सक्रिय रौहदी ऐ ते सुरक्षा गी दिक्खदे होई सब्बने शा महत्वपूर्ण ऐ।

<><><><><><>

JPDCL

जम्मू बिजली विकास कारपोरेशन लिमिटेड नै फैसला कीता ऐ जे ओह बिजली दी चोरी करने आलें खलाफ एफआइआर दर्ज करोग। एह फैसला बिजली इह बंड सरबन्धी कारपोरेशन लिमिटेड दे एमडी विकास कुडल हुंदे आस्सेआ लैता गेआ। उनें एईई गी उनें लोकें जेहड़े बिजली दी चोरी करदे न, खलाफ बिजली कनून 2003 दी दफा 135 तैह्त एफआइआर दर्ज करने लेई गलाया ऐ। इस कनून तैह्त बिजली दी चोरी सजाजोग अपराध ऐ। एहूदे लेई जेल जां फही जुर्माना जां दवै होई सकदे न।

<><><><><><>

EC-Bond

निर्वाचन आयोग नै कल चुनावी बांडे दे नंबर सनें ओहदे कन्ने सरबंधत डेटा सार्वजनिक कीता ऐ। इनें नंबरें च बांडे दी खरीददारें दा धन हासल करने आले राजनीतिक दलें कन्ने मिलान करने च मदाद मिली सकदी ऐ। सर्वोच्च न्यायलय दे आदेश मगरा भारतीय स्टेट बैंक नै एहदे बारे च जानकारी पेश कीती ऐ। एहदे मगरा चुनाव आयोग ते दानदाताएं ते इसी हासल करने आलें दी बक्ख-बक्ख सूचियां अपनी वैबसाईट उप्पर प्रकाशन कीता ऐ।

<><><><><><>

Justice

राष्ट्रपति द्रौपदी मुर्मू होरें न्यायधीश मोहम्मद युसूफ वानी होरें गी जम्मू कश्मीर ते लद्दाख हाई कोर्ट दे अतिरिक्त न्यायधीश दे तौरा पर नियुक्त कीता। एहदे शा पैहले इस म्हीने सुप्रीम कोर्ट दे बेंच नै जेहूदे च मुख्ख न्यायधीश डी.वाई.चन्द्रचूड़ होर बी शामिल हे, युसूफ वानी हुंदे नां दी सिफारश कीती ही। युसूफ वानी होर न्याययिक सेवा च 9 दिसम्बर 1999 च आए हे ते उनें जूडिशियल अफसर दे तौरे पर अपनी सेवा बी दित्ती ऐ। जम्मू कश्मीर ते लद्दाख हाई कोर्ट च कुल 17 जजें दी मंजूरी ऐ, जिंदे च 13 स्थाई जज ते 4 अतिरिक्त जज शामिल न। मोहम्मद युसूफ वानी हुंदी नियुक्ति कन्ने हून हाई कोर्ट च मजूदा जजें दी गिनतरी चीफ जस्टिस एन.कोटश्वर सिंह हुंदे सनें 16 होइ गई ऐ।

<><><><><><>

Eco-Friendly Polling

कडुआ दे जिला चुनाव दफतर आस्सेआ कल जंगलात मैहकमे कन्ने रलियें स्वीप कार्यक्रम दा आयोजन कीता गेआ। आकाशवाणी जम्मू संवाददाता नै जानकारी दित्ती ऐ जे कार्यक्रम दरान लोकसभा चुनाव शा पैहले हीरानगर च इक पर्यावरण अनुकूल मतदान केन्द्र दा उद्घाटन कीता गेआ। तां जे मतदाताएं गी वोअ पाने दे अधिकार बारे होर मता जागरूक बनाया जाई सकै। इस मतदान केन्द्र दा मकसद लोकें गी वोअ पाने दे अपने अधिकार दे इस्तेमाल दे कन्नोकन्नी पर्यावरण अनुकूल गतिविधियां अपनाने लेई बी प्रेरित करना ऐ। पर्यावरण अनुकूल ग्रीन पोलिंग बूथ, भारत-पाकिस्तान अंतर्राष्ट्रीय बन्ने कश गौरमेंट हायर सकेंडरी स्कूल चक्कदा कोल स्थित ऐ। कडुआ जिला इंतजामिया नै सरबंधत धड़ें ते मकामी लोकें गी इस पोलिंग बूथ दा दौरा लाने दी अपील कीती ते सतत गतिविधियां ते जिम्मेदार नागरिकता गी जकीनी बनाने लेई किट्ठे रलियें कम्म करने दी बी अपील कीती।

<><><><><><>

Udhampur SVEEP

उधमपुर जिला प्रशासन आस्सेआ कल स्वीप अणियान तैहत इक जागरूकता कार्यक्रम दा आयोजन करोआया गेआं इस कार्यक्रम दा आयोजन उधमपुर दियां जिला चुनां अधिकारी सलोनी राय हुंदी दिक्ख-रिक्ख च उधमपुर ओल्ड एज होम च करोआया गेआ। आकाशवाणी जम्मू संवाददाता दी जानकारी मूजब जिला पंचैती अफसर ते स्वीप तैहत नामजद नोडल अधिकारिएं बर्जुगें गी चुनां दी महत्ता बारे जागरूक कराया ते दस्सेआ जे चुनां लोकतंत्र दा सब्बने शा बड्डा पर्व ऐ जेहड़ा नागरिकें गी अपने देसै दे शासन गी रूप देने दा इक महत्वपूर्ण मौका उपलब्ध करोआंदे न।

<><><><><><>

Highway

जम्मू श्रीनगर राष्ट्रीय जरनैली शिड़क पर यातायात सूचारू ढंगै सिर जारी ऐ। जम्मू श्रीनगर राष्ट्रीय जरनैली शिड़क पर दौनें भेठा दा गड्डिएं दा आओजाई दी इजाजत ऐ। उआं बड्डी गड्डिएं गी शिड़क दी हालत दा जायजा लैने मगरा श्रीनगर आली भेठा जाने दी इजाजत होग।

<><><><><><>